

1975



2014

### Hesch e Sponsor?

Im Ring si zwoo stierenäckigi Möcke,  
verkeilt inenand, scho ewig am Drücke.  
Si tänzele, höggel, am Gschttöss dōi si risse.  
Scho wider e Gstelle? De füelsch Di scho bschisse.  
Do dreit sich plötzlich dr erscht uss dr Huft,  
spediert dr zwōit z'underobsi dur d'Luft.  
Dā kracht mit em Rugg ins Mähl, dass es sprützt.  
Dr erscht obedruff, dass keis zaable me nützt.

Tatsächlich. Dr Richter git Lutt, es isch z'Änd.  
Dr Gwünner ballt d'Fuscht, me schüttlet sich d'Händ.  
Si hälfe 'nand uff, chlopfe s'Sägmähl sich ab,  
do chōmme au scho die andre im Traab.  
Si träge dr Gwünner uff Axle dur d'Wiise.  
Mir klatsche und är griegt e Muni (e Riise-)!  
Uf em Härwäg ins Tal dänksch „Schwinge isch herlig!  
So ärdig, so ächt, so chraftvoll, so ehrlig!“

Doch bald scho merksch wie dr Chare so lauft:  
Si Schtär het dr Gwünner uff Platz grad verchauft.  
Dr Erlös wird direkt in sis Team inveschiert:  
in PR-Manager, in dä wo massiert,  
in Trainer für d'Medie und in dä fürs Mentale.  
Denn duet dr Gwünner für d'Homestory schtrahle  
und mir stelle fescht, es isch richtig banal.  
S'lauft im Schwinge genau gliich wie im Sport überall.

So häi bald alli Schwingergselle  
e zwōiti Gäld-linamequelle.  
Me wirbt am Färnseh, uf Plakat  
und isch sich grad für gar nütt z'schaad:  
S'empfielt dr Senn, dr Müller Fritz  
öis **Rexona**-Anti-Schwitz.

Dr Gerig Kurt (dasch ganz e Böse)  
jomeret: „Aua, blaui Möse!“  
S'massiert im Wärbespot d'Blondine  
Zärtlich **Voltaren** ihm ine.

Dr Eidgenoss, dr Schüpbach Wälti  
chauft s'Gottlett numme no bim **Aldi**.

Dr Turner Güdel Gabriel  
wäscht s'Liibli wiss mit **Ariel**,  
Dr Bösi Abderhalde Gerhard  
empfiilt Euch **Sbrinz**, und zwar dr sehr hard.  
Und dr Kuenz Franz nimmt bim Kackle  
nur Ambiance Vanille vo **Hakle**.

Dr Gipfel: D'Bank als Hauptsponsor  
haut wieder alli übers Oor.  
Dr Bänkler längt nur schnäll in Chittel,  
und scho si d'Schwinger sini Büttel,  
wo brav im Bankschaufanschter stōön  
zer Image-Pfläg als Tellesöhn,  
wo mit Schlungg und Wüiberhogge  
öis d'Chöle uss dr Täsche locke  
(und hinter Schwingerrugge, starke  
cha d'Bank im Schatte Schwarzgäld parke).

So isch s'Schwinge nümme schön.  
Es dunkt is ender „schwizz-o-phren“:  
Mr zeige s'Heidiland dr Wält,  
doch hindedra goots nur ums Gält.

Drum wäi dä schöni Sport mir rette,  
befreie us de Jet-Set-Chette,  
es Schwingfescht ohni Sponsor plane.  
Bi öis in Sissach mues es ane,  
mit ächtem, unverbruchtem Schwinge!  
Als Hauptpriis chasch e Chüngel gönne.  
Für e Ring wird's Kunschtüdach vermale  
und lütritt muesch e keine zahle.

Erscht denne chasch säge: „Schwinge isch herlig!  
So ärdig, so ächt, so chraftvoll, so ehrlich!“

